


NOVENA



***Long Bleset
Pita To Rot***

Singsing: Pita To Rot

K. Pita To Rot, Pita To Rot, Pita To Rot. God i makim yu, yu wokman bilong em. Pita To Rot, Pita To Rot, Pita To Rot. Mipela i onaim wok bilong yu

1. Yu bilip long God bilong yu, yu no pret long dai. God i wokabout wantaim yu. Yu strong na yu win tru. Yu soim mipela long pasin bilong bilip tru. Yu strong yu gut. Mi amamas long yu tude. (K)

2. Yu go pas long sios bilong Krai hia long Niu Britain. Na yu strongim wok bilong sios long Papua Niu Gini. Yu pre long God long helpim mi long pasin bilong bilip tru. Mi litimapim nem blong yu, yu gutpela. (K)

3. Tok blong God i strong bilong yu, yu bihainim tru. Amamas long wok bilong God i pulapim yu tru. Yu putim God long bel bilong yu. Yu laik em i win tru. Na God i amamas long yu i blesim yu.

Pre bilong Blessed Pita To Rot.

Bikpela Jisas Krai, mipela i amamas long tingim Blessed Pita To Rot. Yu bin singautim em long wok Katekis namel long mipela. Em i sanap strong na i autim Gutnius inap long dai bilong em. Holi Spirit i strongim bilip bilong em. Olsem na i no lusim wok bilong em long taim bilong hevi. Harim pre bilong em na strongim bilip bilong mipela bai mipela i tingting bikpela long lotu na mipela i wok wantaim bai kantri bilong mipela i ken kamap Kristen kantri tru.

Amen.

DE NAMBA 1

Singsing: Pita To Rot

Pre bilong Bleset Pita To Rot

Rit: 2 Stori 24: 17 – 22

Ol Juda i givim baksait long God.

Taim Jehoiada i dai pinis, ol lida bilong Juda i grisim King Joas na em i bihainim tok bilong ol. Na king wantaim ol manmeri bilong Juda na Jerusalem i givim baksait long God, Bikpela bilong ol tumbuna bilong ol, na ol i no moa lotu long haus bilong Bikpela. Nogat. Ol i lotu long ol giaman god na long ol piksa bilong god meri Asera. Ol i mekim bikpela rong long ai bilong God, olsem na God i belhat long ol. Na Bikpela i salim ol profet i kam na givim strongpela tok long ol bilong mekim ol i kambek long em. Tasol ol manmeri i bikheth moa na i no harim tok bilong ol profet.

Orait na Spirit bilong God i kamap strong long Sekaraia, pikinini man bilong pris Jehoiada. Na Sekaraia i go sanap antap long ples klia bai ol manmeri i lukim em, na em i tokim ol olsem, “God, Bikpela i tok, yupela i sakim pinis ol lo bilong em, na bai yupela i no inap i stap gut. Bilong wanem yupela i mekim dispela kain pasin? Yupela i bin givim baksait long God, olsem na em i givim baksait pinis long yupela tu.” King Joas wantaim ol ofisa bilong en i no laikim dispela tok bilong Sekaraia, na ol i pasim tok long kilim em i dai. Orait na king i tok long ol man i tromoi ston long Sekaraia na kilim em i dai long ples bung insait long banis i raunim haus bilong Bikpela. King i no tingim ol gutpela pasin pris Jehoiada, papa bilong Sekaraia, i bin mekim long em. Nogat. Em i kilim nating Sekaraia. Taim Sekaraia i laik i dai, em i tok olsem, “Bikpela i ken lukim dispela samting yupela i mekim na em i ken mekim save long yupela.”

L: *Dispela em i tok bilong God.*

Ol: *Yumi tenkim God.*

Bekim: Long han bilong yu, Bikpela, mi putim spirit bilong mi.

L: God yu ridimim mi, long han bilong yu mi putim spirit bilong mi. Mi amamas bikos yu lukim mi bagarap na yu marimari long mi.

Bekim:

L: God yu sevim mi long han bilong ol birua bai pes bilong yu i givim lait long ai bilong mi. Helpim mi long marimari bilong yu.

Bekim:

(Nau ol pipel i ken skruim na autim ol pre bilong ol...)

Singsing: Klostu long yu O God, klostu long yu. Kruse ken bringim mi klostu long yu. Hevi na pen i kam, mi no ken lusim yu. Mi laik stap wantaim yu klostu long yu.

Namba 1 Hap Rosari bilong Sori: *Tuhat bilong Jisas i kamap olsem blut. Tingting i go pas:*

Jisas i pret long pen na long karim diwai kros. Em i pret long dai olsem yumi save pretim dai. Long dispela pret em i pre long God, na God i givim em strong long winim pret na dringim dispela kap God i givim. Taim ol farisi na ol soldia i kamap, Jisas i redi long bihainim ol na lusim laip bilong em.

Pre Rosari ...

Singsing: Jisas yu dai long mi na yu kirap. mi laik bihainim yu, mi noken pret. Taim mi mas karim pen, mi ken sanap klostu. Klostu long yu O God, klostu long yu.

DE NAMBA 2

Singsing: Pita To Rot
Pre bilong Bleset Pita To Rot

Rit: 2 Makabi 7: 1-2, 9-14.

Mama na 7-pela pikinini i dai.

Narapela taim ol i kalabusim 7-pela brata wantaim mama bilong ol. Ol i paitim ol long rop na kanda, long wanem, king i strong long ol i mas kaikai pik. Wapela brata i stap olsem mausman bilong ol arapela na em i tok olsem, “King, yu laik askim mipela long painimaut wanem samting? Mipela i no inap surik. Maski yu laik kilim mipela i dai, mipela i no ken brukim lo bilong ol tumbuna. Nogat tru.”

Taim em i laik i dai, em i tok strong olsem, “Yu pikinini blong Satan, yu sotim laip bilong mipela nau. Tasol God, em i king bilong dispela graun, em bai i kirapim mipela na givim mipela laip bilong i stap oltaim. Mipela i dai, long wanem, mipela i no laik brukim lo bilong em.”

Orait ol i mekim save long namba 3 brata. Ol i askim em long kaikai pik na em yet i soim tang, na i holim redi han na lek bilong em, bai ol i ken katim. Em i no pret liklik. Em i tok olsem, “Mi bin kisim ol hap bilong bodi bilong mi long han bilong God. Tasol lo bilong God i antap tru long ol hap bodi bilong mi. Na mi save, God bai i givim bek ol dispela hap bodi long mi. King na ol lain bilong en i kirap nogut long lukim dispela yangpela man em i no prèt liklik na em i ting pen em i samting nating. Namba 3 brata i dai pinis, orait namba 4 i karim wankain pen.

Taim em i laik dai, em i tokim king olsem, “Maski. I orait long yupela i kilim mi i dai. Tasol God bai i kirapim mi gen na givim laip long mi. Tasol yu, king, yu no inap long kirap long nupela laip. Nogat tru.”

L: *Dispela em i tok bilong God.*

Ol: *Yumi tenkim God.*

Bekim: God i mekim mi fri long olgeta pret bilong mi.

L: Long olgeta taim mi laik singsing amamas long God. Maus bilong mi i givim ona long em. Sol bilong mi i amamas long Bikpela. Ol rabisman ol i harim na ol i singsing.

Bekim:

L: Givim ona long nem bilong Lord. Yumi olgeta i laik singsing long nem bilong em. Mi painim God na em i harim singaut bilong mi, em i mekim mi fri long olgeta pret bilong mi.

Bekim:

(Nau ol pipel i ken skruim na autim ol pre bilong ol...)

Singsing: Mi laik bihainim bikpela Jisas (3x). Mino go bek, mi no go bek.

Namba 2 Hap Rosari: *Ol i paitim Jisas nogut.*

Tingting i go pas:

Jisas i pilim pen long long taim ol i paitim em. Ol i paitim em nating bikos em i nogat rong. Rong i stap long ol man ol i paitim em na long ol manmeri i mekim sin. Planti taim yumi kisim pen long ol manmeri, tasol yumi mas tingim, yumi tu i gat rong long God bikos long ol sin bilong yumi.

Singsing: Jisas yu dai long mi, na yu kirap. Mi laik bihainim yu, mi no ken pret. Taim mi mas karim pen, mi ken sanap klostu. Klostu long yu O God, klostu long yu

DE NAMBA 3

Singsing: Pita To Rot

Pre bilong Bleset Pita To Rot

Rit: Gutpela Stretpela Tingting 3: 1-9

Ol gutpal manmeri i

sindaun wantaim God.

Ol lain bilong Satan bai i lus, tasol taim ol stretpela manmeri i dai pinis, ol i save stap long han bilong God, na ol i no ken karim pen moa. Ol longlong manmeri i ting, ol dispela stretpela manmeri i bin kisim bikpela bagarap na ol i lus na i pinis olgeta. Tasol nogat. Ol dispela gutpela manmeri i stap bel isi nau. Long ai bilong ol manmeri i luk olsem ol i kisim pe nogut.

Tasol nogat. Ol dispela stretpela manmeri i gat strongpela bilip, ol bai i stap gut oltaim. Tru, ol i bin karim pen. Tasol God bai i mekim gut tru long ol. Na long taim ol i karim pen, God i bin rausim ol pasin nogut bilong ol na ol i kamap gutpela tru, na ol inap sindaun wantaim God. Ol man i save mekim wankain pasin long gol. Ol i kukim gol long paia i hat tumas, bilong rausim pipia na kisim gutpela gol tru. Yes, God i belgut long ol stretpela man, na em i kisim ol olsem em i save kisim ol ofa bilong paia i kukim olgeta.

Taim God i kam bilong skelim ol gutpela manmeri bai ol i lait olsem bikpela paia i kukim kunai. Ol gutpela manmeri bai i bosim olgeta lain pipel na olgeta kantri, na Bikpela bai i stap king bilong ol inap oltaim oltaim. Ol manmeri i bilip strong olsem, God i was gut long ol, ol bai i klia long as tingting bilong em. Na ol manmeri i bihainim lo bilong God, ol bai i stap wantaim em na laikim em oltaim. Long wanem, God i gutpela tru na em i save marimari long olgeta manmeri em i makim pinis.

L: *Dispela em i tok bilong God.*

Ol: *Yumi tenkim God.*

Bekim: Bikpela em i lait bilong mi na helpim bilong mi.

L: Bikpela em i lait bilong mi na helpim bilong mi. Bai mi pret long husat?

Bekim:

L: Mi bilip tru bai mi lukim ol gutpela samting bilong God long taim mi stap yet long dispela graun. Bikpela bai i strongim bel bilong yu. Sanap strong na wetim em.

Bekim:

(Nau ol pipel i ken skruim na autim ol pre bilong ol...)

Singsing: Mi litimapim biknem bilong yu. Yu yet yu God, yu Bikpela. Yu nambawan, yu antap olgeta. Yu wanpela yu Bik-pe-la.

Namba 3 Hap Rosari: *Ol i putim rop i gat nil long het bilong Jisas.*

Tingting i go pas:

Ol i putim dispela rop i gat nil long het bilong Jisas bikos ol i laik tok pilai long em. “Yu tok yu king bilong heven na graun, tasol nau yu olsem samting nating. I nogat ona long yu, i nogat strong long yu.” Jisas i givap long olgeta ona bilong graun bilong bekim pasin bilong apim nem bilong yumi.

Singsing: Mi laik bihainim Bikpela Jisas...

DE NAMBA 4

Singsing: Pita To Rot

Pre bilong Blessed Pita To Rot

Rit: Rom 8: 31b- 39 *Sapos God i helpim yumi, orait, husat bai i birua long yumi?*

God i no bin pasim Pikinini bilong em yet. Nogat. Em i bin salim em i kam bilong helpim yumi olgeta. Na sapos em i givim yumi Pikinini bilong em yet, orait ating em bai i givim yumi olgeta arapela samting tu. God i bin makim yumi bilong em yet, olsem na husat bai i kotim yumi? Nogat. God yet i save kolim yumi stretpela man. Husat bai i tok long yumi mas kisim pe nogut bilong sin? Nogat. Krai Jisas i bin i dai, na em i kirap bek tu. Na nau em i stap long han sut bilong God, na em i save askim God long helpim yumi. Krai i save laikim yumi moa yet, na i no gat wanpela samting inap pasim dispela laik bilong en i kamap long yumi wanwan. Sapos hevi i kamap long yumi, o sapos yumi karim pen, o sapos ol man i mekim nogut long yumi, o sapos yumi hangre, o sot long klos, o sapos samting nogut i laik bagarapim yumi, o sapos pait i kamap long yumi, ating dispela olkain samting bai i inap long pasim laik bilong Krai? Nogat tru.

Tru, ol dispela kain samting i save kamap long yumi, olsem buk bilong God i tok, “Mipela i stap manmeri bilong yu, olsem na long olgeta taim ol i save kilim mipela i dai. Ol i lukim mipela i olsem sipsip bilong kilim i dai tasol.” Tasol Krai i bin givim bel bilong en long yumi, na maski wanem kain samting i kamap long yumi, oltaim em i save mekim yumi i win tru. Yes God i save laikim yumi tru, na mi bilip tru olsem, i no gat wanpela samting inap pasim laik bilong God i kamap long yumi. Dai o laip, o ol ensel o ol strongpela spirit, o samting nau i stap o samting bai i kamap bihain, o kain kain samting i gat strong, o samting bilong antap o samting bilong daunbilo, o ol arapela samting i stap nabaut, dispela olgeta i no inap pasin laik bilong God, em dispela laik em i givim yumi long Krai Jisas, Bikpela bilong yumi.

L: *Dispela em i tok bilong God.*

Ol: *Yumi tenkim God.*

Bekim: Bikpela i pulap long marimari, na oltaim em i redi long helpim yumi.

L: Bikpela, bel bilong mi i pulap long wari. Mi krai long yu nau. Bikpela, opim yau bilong yu, harim singaut bilong mi.

Bekim:

L: Mi wet bai Bikpela i helpim mi, mi bilip tru long promis bilong em. Ol wasman i wetim tulait i kamap, moa yet spirit bilong mi i wetim Bikpela.

Bekim:

(Nau ol pipel i ken skruim na autim ol pre bilong ol...)

Singsing: Mi laik bihainim Bikpela Jisas (3x). Mi no go bek, mi no go bek.

Namba 4 Hap Rosari: *Jisas i karim diwai kros.*

Tingting i go pas:

Jisas i karim dispela diwai kros, i hevi long ol sin bilong yumi. Klostu dispela hevi i winim Jisas. Tripela taim em i pundaun. Tasol em i sanap gen na i go long dispela rot. Bihain Saimon bilong Sairini i helpim em long karim diwai kros. Olsem Saimon, yu mas helpim Jisas long karim diwai kros.

Singsing: Maski ol hevi, mi karim kruse (3x) Mi no go bek, mi no go bek.

NAMBA DE 5

Singsing: Pita To Rot.

Pre bilong Blessed Pita To Rot

Rit Jems 1: 2-4, 12.

Ol traim i save strongim yumi.

Ol brata bilong mi, sapos ol kain kain traim i kamap long yupela, orait yupela i ken ting olsem, em i samting bilong amamas tasol. Yupela i save, samting i kamap na i traim bilip bilong yupela, em i save kamapim pasin bilong sanap strong na karim hevi. Orait oltaim yupela i mas sanap strong na karim hevi, bai dispela pasin i ken kamap strong tru long yupela. Olsem na bai yupela i stap gut, na yupela bai i no sot long wanpela pasin bilong God. Nogat. Pasin bilong yupela bai gutpela na i stret olgeta.

Man i save sanap strong na i karim hevi long olgeta traim, em i ken amamas. Sapos em i winim pinis olgeta traim, orait God bai i givim em laip bilong i stap gut oltaim, olsem prais bilong en. God i tok pinis long givim dispela prais long olgeta man i save laikim em tru.

L: *Dispela em i tok bilong God.*

Ol: *Yumi tenkim God.*

Bekim: Bikpela, sambai long mi long taim bilong hevi.

L: Ol manmeri i stap long haus bilong God na ol i larim God i gat olgeta strong i lukautim ol. Ol i save tok olsem long Bikpela: God yu ples hait bilong mi. Yu strongpela haus, mi bilip long yu tasol.

Bekim:

L: Bai ol i karim yu long han bilong ol, na wanpela ston i no inap sutim lek bilong yu; bai yu wokabaut antap long ol snek i gat poisin, na bai yu krungutim ol laion na ol bikpela snek dragon.

Bekim:

(Nau ol pipel i ken skruim na autim ol pre bilong ol...)

Singsing: Planti taim tru tumas rot i no lait. Mi olsem aipas man i stap long biknait, yu yet yu lait blong mi taim mi stap wantaim yu. Klostu long yu O God, klostu long yu

Namba 5 Hap Rosari: *Jisas i dai long diwai kros.*

Tingting i go pas:

Jisas i dai, em i pinisim dispela wok bilong em. Em i kam long bekim sin na bilong opim rot bilong heaven long yumi. Jisas i tok, “ I pinis nau”. Yumi pilim dispela bikpela amamas bilong Jisas long pinisim dispela bikpela wok bilong em. Long dai em i win.

Singsing: Jisas yu dai long mi, na yu kirap. Mi laik bihainim yu, mi-noken pret. Taim mi mas karim pen mi ken sanap klostu. Klostu long yu O God, klostu long yu.

DE NAMBA 6

Singsing: Pita To Rot

Pre bilong Blessed Pita To Rot

Rit: 1 Pita 4: 12-19 *Yumi ken amamas long karim pen olsem Krai.*

Ol brata tru, wanpela traim olsem paia i wok long kamap long yupela. Tasol yupela i no ken kirap nogut na ting em i narakain samting tru i kamap long yupela. Nogat. Long dispela traim yupela i karim pen olsem Krai i bin karim, olsem na yupela i mas amamas. Na taim biknem bilong Krai i kamap ples klia, bai yupela inap amamas moa yet na belgut tru. Yupela i holim nem bilong Krai, na sapos long dispela ol i tok nogut long yupela, orait yupela i ken amamas. Long wanem, yupela i save, Spirit bilong God, em Spirit i gat biknem na strong, em i stap long yupela.

Yupela i mas lukaut, nogut ol i givim pen long yupela, long wanem, yupela i bin kilim man i dai o stilim ol samting o mekim ol arapela kain pasin nogut o yupela i bin paulim wok bilong ol arapela. Tasol sapos man em i Kristen, na long dispela as em i karim pen, orait em i no ken sem. Nogat. Em i mas amamas long dispela nem Kristen, na litimapim nem bilong God.

Taim bilong God i kirapim kot long yumi ol lain bilong em yet, dispela taim i kamap pinis. Na sapos kot i stat long yumi pastaim, orait bai em i pinis olsem wanem long ol man i save sakim gutnius bilong God? Buk bilong God i tok olsem, “Sapos i hat tru long kisim bek ol stretpela man, orait olsem wanem long ol man i save givim baksait long God na mekim sin?”

Olsem na sapos long laik bilong God sampela man i mas karim pen orait dispela ol man i mas putim laip bilong ol long han bilong God na mekim ol gutpela pasin tasol. God i bin wokim yumi na oltaim em i save lukautim yumi gut tru.

L: *Dispela em i tok bilong God.*

Ol: *Yumi tenkim God.*

Bekim: God, klinim tru bel bilong mi.

L: Bikpela, marimari long mi. Bikpela, sori bilong yu i mas tekewe olgeta sin bilong mi. Wasim mi gut tru, na tekewe olgeta rong bilong mi.

Bekim:

God klinim tru bel bilong mi, putim nupela spirit insait long mi. Yu no ken rausim mi i go longwe long yu. Yu no ken tekewe Holi Spirit bilong yu long mi.

Bekim:

(Nau ol pipel i ken skruim na autim ol pre bilong ol...)

Singsing: Jisas i dai long diwai kros i winim seten long matmat. I winim dai na kirap bek, Jisas i win oltaim. Aleluya Jisas i win ...

Namba 1 Hap Rosari: *Jisas i kirap long dai.*

Tingting i go pas:

Jisas i soim yumi, dai i no pinis bilong man. Dispela bodi tasol i dai na i go bek long graun. Tasol God i makim yumi long laip bilong oltaim. Taim yumi sik o taim yumi lapun, na yumi dai, bai dai i no pinis bilong yumi. Olsem olgeta samting yumi wokim long laip bilong yumi i mas kamap olsem wanpela step long rot bilong yumi i go long God.

Singsing: Jisas yu dai long mi na yu kirap. Mi laik bihainim yu, mi- noken pret. Taim mi mas karim pen, mi ken sanap klostu. Klostu long yu O God, klostu long yu.

DE NAMBA 7

Singsing: Pita To Rot.

Pre bilong Blessed Pita To Rot

Rit: Mt 10: 28-33

Yumi mas stap long lain bilong Jisas.

Yupela i no ken pret long ol man i save kilim i dai bodi, tasol ol i no inap kilim spirit bilong yupela. Nogat. Yupela i mas pret long God tasol. Em inap bagarapim spirit na bodi tu long hel. “Yupela i save, ol man i save baim tupela liklik pisin long 10 toea tasol. Na papa bilong yupela i save lukautim gut ol dispela pisin. Sapos em i no laik, orait i no inap wanpela bilong ol i pundaun long graun. Na tu, God i kaunim pinis olgeta gras long het bilong yupela, na em i save gut tru long yupela. Olsem na yupela i no ken pret. Yupela i winim planti lain liklik pisin.”

Jisas i tok moa olsem, “Man i save tokim ol manmeri olsem em i stap long lain bilong mi, mi tu bai mi tokim Papa bilong mi long heaven olsem dispela man em i bilong mi. Tasol man i tokim ol manmeri olsem em i no man bilong lain bilong mi, mi tu bai mi tokim Papa bilong mi long heaven olsem dispela man em i no bilong mi.”

L: *Dispela em i tok bilong God.*

Ol: *Yumi tenkim God.*

Bekim: God, mi ran i kam long yu, yu save was long mi.

L: Bel bilong mi i stap isi insait long mi, na bodi bilong mi tu i no save pret liklik. Long wanem, Bikpela yu no inap long larim mi i stap long ples bilong ol manmeri i dai pinis. Na yu noken larim pren bilong mi i sting long matmat.

Bekim:

L: Bai yu soim rot bilong laip long mi. Mi stap klostu long yu na mi pulap long amamas. Mi sanap long raithan bilong yu na mi amamas oltaim.

Bekim:

(Nau ol pipel i ken skruim na autim ol pre bilong ol...)

Singsing: O Papa God taim mi gat planti tingting, long olgeta samting yu yet wokim. Mi lukim sta, mi harim klaut i pairap. Olgeta samting i soim strong blong yu. Mi litimapim biknem bilong yu...

Namba 2 Hap Rosari: *Jisas i go long heven.*

Tingting i go pas:

Jisas i go bek long heven bai em i ken amamas wantaim Papa bilong em. Wok bilong em hia long graun i pinis, tasol tingting bilong em i stap long yumi yet. Em i go long redim ples bilong yumi long heven. Em i tok, bai mi stap wantaim yupela long olgeta taim inap ol taim i pinis. Em i stap wantaim yumi long sakramen na strongim yumi long bodi na blut bilong em.

Singsing: Yu Lord, O yu Lord...Yumi wanpela ples em i stap long heven...

DE NAMBA 8

Singsing: Pita To Rot

Pre bilong Blessed Pita To Rot

Rit: Jon 15: 18-21 *Ol man bilong graun bai i birua long ol disaipel.*

Jisas i tok moa olsem, “Sapos ol manmeri bilong graun i birua long yupela, orait yupela i no ken lusim tingting, pastaim ol i bin birua long mi tu. Sapos yupela i stap olsem ol man bilong dispela graun, orait ol manmeri bilong graun ol inap laikim yupela olsem ol lain bilong ol yet. Tasol yupela i no man bilong dispela graun. Nogat. Mi makim yupela pinis bai yupela i lusim pasin bilong dispela graun. Olsem na ol manmeri bilong graun i save birua long yupela. Yupela i mas tingim gut dispela tok mi mekim long yupela. Wokboi i no winim bikman bilong en. Sapos ol i bin mekim nogut long mi, orait ol bai i mekim nogut long yupela tu. Na sapos ol i bin bihainim tok bilong mi, orait ol bai i bihainim tok bilong yupela tu. Tasol ol i no save long Papa, em i bin salim mi na mi kam. Olsem na ol bai i mekim olgeta dispela pasin nogut long yupela, long wanem, ol i save olsem yupela i lain bilong mi.

L: *Dispela em i tok bilong God.*

Ol: *Yumi tenkim God.*

Bekim: Mi singsing long Bikpela, em i kisim bek mi.

L: Bikpela, mi laik litimapim nem bilong yu, long wanem yu kisim mi bek pinis. Na yu no larim ol birua i lap nogut long mi. Bikpela, mi bin bungim ol lain bilong ol manmeri i dai pinis, tasol yu givim bek laip bilong mi.

Bekim:

L: Bikpela, harim mi na marimari long mi. Bikpela, yu kam na helpim mi. Yu tanim sori bilong mi i kamap amamas. Bikpela, yu God bilong mi, bai mi tenkyu long yu inap oltaim oltaim.

Bekim:

(Nau ol pipel i ken skruim na autim ol pre bilong ol...)

Singsing: Yes, laip blong yumi i naispela tru, taim Krai i stap klostu (2x)
Yumi painim belgut pinis. Em i helpim yumi nau, bai olgeta pipel painim belgut bilong Jisas Krai.

Yes, Laip blong yumi i naispela tru, taim Krai i stap klostu (2x)

Namba 3 Hap Rosari: *Jisas i salim Holi Spirit i kamdaun.*

Tingting i go pas:

Jisas i salim Holi Spirit i kamdaun long ol aposel. Holi Spirit i strongim ol long mekim dispela wok misin bilong ol. Yumi kisim Holi Spirit long sakramen bilong konfirmasio. God i makim yumi tu long wok insait long sios na kirapim Kingdom bilong Em hia long graun.

Singsing: Yu Holi Spirit kam long mi, mi askim yu kam nau. Kam laitim paia winim strong, bai mi no givap gen.

DE NAMBA 9

Singsing: Pita To Rot

Pre bilong Blessed Pita To Rot

Rit: Mt 10: 17-22

Ol kain kain hevi bai i kamap.

Yupela lukaut long ol man. Ol bai i kotim yupela long ol kaunsil bilong ol, na ol bai wipim yupela insait long ol haus lotu bilong ol. Ol bai i ting long daunim mi, na pulim yupela i go long ol gavman na ol king. Olsem na bai yupela i ken autim gutnius long ol dispela bikman, na long ol arapela haiden tu. Taim ol i bringim yupela i go long kot, yupela i no ken pret na ting, ‘Mipela bai mekim wanem kain tok? Na mipela bai i bekim wanem tok?’ Nogat. Long dispela taim stret God bai i soim yupela long tok yupela i mas autim. Long wanem, i no yupela yet bai i autim tok. Nogat. Spirit bilong Papa bilong yupela, em bai i autim tok long maus bilong yupela. Man bai i kotim brata bilong en, na tokim ol long kilim dispela brata i dai. Na ol papa bai i mekim wankain pasin long ol pikinini bilong ol. Na ol pikinini bai i birua long papamama bilong ol na tokim ol man long kilim ol i dai. Na olgeta man bai i bel nogut tru long yupela, long wanem, nem bilong mi em i stap long yupela.

Tasol ol manmeri i stap strong inap long las de, God bai i kisim bek ol.

L: *Dispela em i tok bilong God.*

Ol: *Yumi tenkim God.*

Bekim: Bikpela, salim Spirit i kam, na mekim graun i kamap nupela gen.

L: Spirit bilong mi, litimapim nem bilong Bikpela. God, Bikpela bilong mi, yu antap tru. Yu naispela tru, yu karamap long bilas. Lait i olsem klos bilong yu.

Bekim:

L: Bikpela, yu wokim planti samting tru. Ol i smat na ol i soim save bilong yu. Graun i pulap long ol kain gutpela samting bilong yu. Spirit bilong mi, litimapim nem bilong Bikpela.

Bekim:

(Nau ol pipel i ken skruim na autim ol pre bilong ol...)

Singsing: Yumi singsing nau: Lord yuk am (3x)

O Lord Jisas Kam (2x)

Yumi pre oltaim: Lord yu kam (3)

O Lord Jisas kam (2x)

Namba 4 Hap Rosari: *Jisas i kisim Maria i go long heven*

Tingting i go pas:

Jisas i kisim mama bilong em i go long heven long bodi na sol bilong em. Dispela bodi i karim pikinini bilong God i no ken bagarap long graun. Maria i mama bilong yumi tu. Em i stap long heven na i ken bringim ol pre bilong yumi long pikinini bilong em.

Singsing: Maria gut Mama mi tingting long yu
Yu nambawan meri mi singsing long yu

K: Ave, Ave, Ave Maria (2x)

Mi kolim yu Mama wantaim long Jisas
Yu oltaim lukatim, yu helpim mi tu. (K)

Maria gut Mama mi laikimi yu tru.
Yu stap nau long heven, yu tingting long mi (K)

O kwin bilong heven lukdaun nau long mi
O gutpal Mama yu no lusim mi. (K)

Pita To Rot em i Marit Man, Katekis na Martir.

Marit Man. Famili em i ples we lei man na lei meri wantaim ol pikinini na ol arapela memba i bung wantaim, stap wantaim na i pre wantaim. Em i ples we wanpela i sapatim narapela. Em i ples we olgeta i kisim save long pasin bilong laikim narapela na i gro long pasin bilong kamap holi. Pita To Rot em i man bilong famili. Marit bilong em i stret na i gutpela tru. Em i putim famili i namba wan long laip bilong em. Sapos sampela hevi na wari i kamap long famili, em i wok strong na i soim stretpela pasin, gutpela tingting na laikpasin long arapela. Long gutpela marit bilong em, em i soim pasin bilong kamap holi long ol arapela lei manmeri insait long famili bilong ol.

Katekis. God Papa i singautim yumi wanwan long inapim plen bilong em. Dispela singaut bilong God yumi kolim vokesen. God i no putim yumi hia long graun olsem bilas nating bilong ples. Nogat. God i givim yumi wanwan kain kain presen na save, strong na grasia bilong lukautim dispela graun na mekim gut long narapela narapela. Long wok vokesen bilong yumi, yumi inapim dispela plen bilong God. Pita To Rot em i man bilong wok. God i singautim em long mekim wok katekis. Pita To Rot i putim olgeta save na strong bilong em, olgeta gutpela tingting na laikpasin em i gat, long inapim dispela wok na sinagut bilong God. Long wok vokesen bilong em olsem katekis, em i soim pasin bilong kamap holi long ol arapela lei manmeri husat i gat kain kain wok na ministri long ples.

Martir. Yumi mas stap strong long bilip na bihainim skul bilong Katolik Sios. Kain kain pasin nogut bilong dispela graun i save traim bilip bilong yumi. Kain kain skul na toktok bilong narapela lotu, em tu i save traim bilip bilong yumi ol Katolik. Kain kain pasin tumbuna, olsem sanguma na poisin, em tu i traim bilip bilong yumi. Pita To Rot em i man bilong bilip. Em i givim laip bilong em olgeta long God. Em i laikim tru Katolik Sios inap long em i dai olsem martir. Long pasin bilong strongpela bilip, em i soim pasin bilong kamap holi long ol arapela lei manmeri i gat kain kain traim long laip.

